

TAIALA MO TALAFAASOLOPITO O LE EKALEZIA



Talafaasolopito Faaletausaga o Siteki, Itu, ma Misiona



• AOINA MAI, FAASAOINA, MA LE FAASAOINA ATU O TALAFAASOLOPITO O LE EKALEZIA •

TAIALA MO TALAFASOLOPITO O LE EKALLESIA

Talafasolopito Faaletausaga o Siteki, Itu, ma Misiona

Lolomi ma faasalalauina e
O Le Ekalesia a Iesu Keriso o le
Au Paia o Aso e Gata Ai
Aai o Sate Leki, Iuta

© Puletaofia 2014 e le Intellectual Reserve, Inc.

Ua taofia aia tatau uma.

Lolomi i le Iunaite Setete o Amerika

Faamaonia le faa-Peretania: 1/14

Faamaonia le faaliliuga: 1/14

Faaliliuga o le *Church History Guides: Stake, District, and Mission Annual Histories*

Samoan

09374 890

Vaaiga Aoao o le Talafaasolopito o le Ekalesia


Faatonuga mo le Saunia o le Talafaasolopito Faaletausaga o le Siteki, Itu, Uarota, po o le Paranesi

Faamoemoega

O le sauniaina ma le auina atu o se talafaasolopito faaletausaga e fesoasoani i le faataunuaina o le poloaiga a le Alii ina “ia faaauau pea. . .ona tusinga ma faia se talafaasolopito o mea taua uma. . .e uiga i la’u ekalesia. . . .O lenei foi, e tatau i a’u auauna o e o loo i fafo i le lalolagi ona auina atu tala o a latou matafaioi” (MF&F 69:3, 5).

Vaaiga Aoao

- O taitai perisitua e tofiaina se failautusi po o se tagata e i ai se tomai faapitoa i talafaasolopito o loo galue i lalo o le taitaiga a le failautusi e saunia se talafaasolopito faaletausaga.
- O le tagata ua tofia e aoina mai anotusi i le tausaga atoa ma e valaaulia isi e saofaga mai ni tala ma ni faamatalaga.
- O le tagata ua tofia na te aoina mai ma tuu faatasia le talafaasolopito faaletausaga.
- O le taitai perisitua e faamaoniaina.
- Ona auina atu lea o le talafaasolopito faaletausaga i le siteki po o le itu. O le siteki po o le itu e tuu faatasia ia talafaasolopito a le uarota po o le paranesi faatasi ai lana lava lipoti ma auina atu i se talafaasolopito faaletausaga e tasi i le Matagaluega o Talafaasolopito a le Ekalesia.



O Mea e Aofia Ai

AUAILILI
AUTU

1. Pepa faavaa
2. Se faamatalaga puupuu e faamatala ai mea taua na tutupu i le tausaga ma atinaega, ia aofia ai tala faatupu-faatuatua.
3. Kalena a le iunite
4. Fomu e Lagolago ai Taitai e faitau i konafesi a le iunite
5. O lipoti mai taitai perisitua ma ausilali o loo aotele ai a latou taumafaiga ina ia fesoasoani i tagata taitoatasi ma aiga ia agavaa mo le faaeaga.
6. Faamaumauga taua na fatuina e pe e faatatau i le iunite

Manatua: Aua nei faaofiaina i le talafaasolopito faaletausaga ni anomea e le faalauaiteleina pe patino e aunoa ma le tuuese mai le talafaasolopito atoa ma le faailogaina faapena.

Auina atu

- Ia oo atu i le aso 1 o Mati ua auina atu e uarota ma paranesi ia talafaasolopito faaletausaga i siteki, itu, po o misiona.
- Ia oo atu i le aso 31 o Mati ua auina atu e siteki, itu, ma paranesi ia talafaasolopito faaletausaga i le Matagaluega o Talafaasolopito a le Ekalesia.
- O iunite i le Iunaite Setete ma Kanata ia auina atu i le:
Matagaluega o Talafasolopito a le Ekalesia, 15 East North Temple Street, Salt Lake City, UT 84150-1600
- O iunite i fafo atu o le Iunaite Setete ma Kanata ia auina atu i ofisa o le pulega ua atofaina atu ia i latou.

Mo nisi faamatalaga, asiiasi i le www.lds.org/annualhistories.

Anotusi

| | |
|---|----|
| Folasaga | 1 |
| Faavae Faale-Aoaoga Faavae | 2 |
| Faatonuga mo Talafaasolopito Faaletausaga | 3 |
| Li’o o le Talafaasolopito Faaletausaga | .3 |
| O Mea e Aofia Ai. | .4 |
| Tiala mo Mea e Le Faalauaiteleina | .6 |
| Faatonuga mo le Auina Atu o Talafaasolopito | .6 |
| Punaoa | 9 |
| Fuaitau mai le “E! la Manatua, la Manatua Lava,” na saunia e Peresitene Henry B. Eyring (lauga o le konafesi aoao) | 10 |
| Fuaitau mai le “la Manatua Ina la E Le Fano,” na saunia e Elder Marlin K. Jensen (lauga o le konafesi aoao) | 11 |
| Lipoti a le Au Perisitua ma Ausilali (mamanu) | 12 |
| Faamaumauina o Aafiaga Faaleagaga Faaletagata Lava la ma Faaleaiga (mamanu) | 13 |
| Faatagaga e Faaaoga ai Atapue (fomu) | 14 |
| Fomu o le Maliega o Talafaasolopito Faaletausaga | 16 |
| Anavatau mo Faamatalaga e Le Faalauaiteleina a le Ekalesia | 17 |

Folasaga



Potutusi o Talafaasolopito o le Ekalesia i le Aai o Sate Leki, Luta

O le sauniaina ma le auina atu o talafaasolopito faaletausaga o siteki, itu, po o misiona e fesoasoani lea i le faataunuuina o le poloaiga a le Alii: “Ia faaauau pea. . .ona tusitusi ma faia se talafaasolopito o mea taua uma. . . e uiga i la’u ekalesia. . . .O lenei foi, e tatau i a’u auaina o e o loo i fafo i le lalolagi ona auina atu tala o a latou matafaioi” (MF&F 69:3, 5).

O faamoemoega o talafaasolopito faaletausaga o le:

1. Aumaia o tagata ia latalata atili ia Keriso e ala i le fesoasoani ia i latou ia manatua mea na faia e le Atua mo Ana fanau ma e Na te faataunuuina i taimi uma Ana folafolaga.
2. Faaauau pea ona faamaumauina ia talafaasolopito faaona po nei a le Ekalesia.
3. Tuuina atu i taitai se avanoa e mafaufau ai i a latou taumafaiga e fesoasoani i tagata taitoatasi ma aiga ia agavaa mo le faaeaga.

Ua saunia e lenei taiala ni aoaoga ma punaoa autu mo le tuufaatasia o talafaasolopito faaletausaga. Mo nisi faamatalaga, asiase i le [lds.org/annualhistories](https://www.lds.org/annualhistories).

I lenei taiala atoa, o le *uarota* ma *siteki* e faasino foi i le *paranesi* ma *itu*.



O talafaasolopito faaletausaga na auina atu o loo teuina i le Potutusi o Talafaasolopito o le Ekalesia.

Faavae Faaleaoaoga Faavae



O faamaumauga ia na tuu faatasia anamua e Mamona na ave a ma se faamanuia taau mo augatupulaga mulimuli ane.

O le talafaasolopito faaletausaga e aumaia tagata ia latalata atili ia Keriso e ala i le fesoasoani ia i latou ia manatua “mea tetele na faia e le Alii” (itulau autu o le Tusi a Mamona). E faateleina le faamoemoe ma le mautinoa ona o se taunuuga o le iloaina o mea e uiga i isi o e na fetai ai ma luitau ma, faatasi ai ma le fesoasoani a le Alii, ua manumalo mai ai. O le aoao mai talafaasolopito e fesoasoani lea ia i tatou ina ia aloese mai le toe faia foi o mea sese ma maua ai se lagona o le faasinomaga ma le tupuaga. O lenei auala, ua faamanuia ai e le talafaasolopito o le Ekalesia ia augatupulaga o loo soifua faapea le lumanai.

E mafai ona maua nisi malamalamaaga e ala i le sue-sue i mau nei ma fuaitau mai saunoaga o le konafesi aoao o loo maua i le vaega o “Punaoa” (i. 10–11).

MF&F 21:1

“Faauta, ia i ai se tala faamaumau e tausia i totonu o outou.”

MF&F 47:3

“O lenei foi, Ou te fai atu ia te oe ia tofia o ia [o le Tusitala o Talafaasolopito a le Ekalesia] na te tausia e le aunoa le talafaamaumau ma le talafaasolopito o le ekalesia.”

MF&F 69:3, 5

“Ia faaauau pea. . .ona tusitusi ma faia se talafaasolopito o mea taua uma. . . e uiga i la’u ekalesia.”

“O lenei foi, e tataui a’u auauna o e o loo i fafo i le lalolagi ona auina atu tala o a latou matafaioi.”

MF&F 85:1–2

“O le tiute o le failautusi a le Alii . . . o le tausia o se talafaasolopito . . . o mea uma e tutupu i Siona, . . .

“Ma o latou olaga foi, o latou faatuatua, ma galuega.”

Alema 37:6–8

“O mea laiti ma faatauavaa e faataunuu ai mea tetele. . . .

“. . . Ma o auala laiti lava e faamaasiasi ai e le Alii e popoto, ma aumai ai le olataga o agaga e toatele.”

“Ma o lenei, e oo mai i le taimi nei, o le poto o loo i le Atua ua faasaosaoina ai nei mea; aua faauta, ua latou faalateleina le manatu o lenei nuu, ioe, ma faatalitono le toatele i le sese o o latou ala, ma aumai i latou i le malamalama o lo latou Atua mo le olataga o o latou agaga.”

Alema 37:14

“Ma o lenei ia e manatua, lo’u atalii e, ua tuuina mai nei mea faamaumauga e le Atua ia te oe, o ni mea ua paia, ia sa ia tausia i le paia, ma o ni mea foi o le a ia tausia ma faasaosaoina mo se faamoemoe poto ua ia te ia, ina ia mafai ona ia faailoa atu lona mana i tupulaga o lumanai.”


Faatonuga o Talafaasolopito Faaletausaga

Li'o o le Talafaasolopito

Faaletausaga

Ina ia faataunuuina le poloaiga e "tausia e le aunoa le talafaamaumau ma le talafaasolopito o le ekalesia" (MF&F 47:3), e tatau i iunite uma o le Ekalesia ona tuu faatasia se talafaasolopito faaletausaga anoa ma sa'o.

O le tuu faatasia o le talafaasolopito faaletausaga e tatau ona amata ia Ianuari ma faaauau ai pea i le tausaga atoa, ma e faagataina le auina mai i le aso 31 o Mati o le tausaga e sosoo ai. E tatau i uarota uma ona fatu lo latou lava talafaasolopito ma auina atu i le siteki. O le a tuu faatasia e le siteki ia saofaga mai uarota faatasi ai ma le latou lava talafaasolopito ma auina atu i se lipoti e tasi i le Ekalesia. ([Tagai "Faatonuga mo le Auina Atu" mo nisi faamatalaga.](#))



Li'o mo le sauniaina o se talafaasolopito faaletausaga



O le tagata ua tofia na te aoina mai ma tuu faatasia ia anomea mo le talafaasolopito faaletausaga.

O le laasaga muamua lava i le faagasologa o le atofa atu lea o le tiutetauave mo le tuu faatasia o le talafaasolopito i failautusi o le uarota po o le siteki, se tagata e i ai se tomai faapitoa i talafaasolopito o loo galue i lalo o le taitaiga a le failautusi, po o se faifeautalai i le ofisa o le misiona. O ia e tatau ona aoina mai anomea i le tausaga atoa ma e mafai ona valaaulia isi e saofaga mai ni tala ma ni faamatalaga. ([Tagai "O Mea e Aofia Ai."](#)) I le tulata atu i le faaiuga o le tausaga, o le a tuu faatasia nei anomea ma tuuina atu i le taitai perisitua a le iunite mo le faamaoniga ma le auina mai.



O Mea e Aofia Ai

E lua ni filifiliga mo le tuufaatasia o le talafaasolopito faaletausaga a le siteki: autu po o le auiliili. O le a fuafua e le peresitene o le siteki, e tusa ma le gafatia o iunite taitasi o lana siteki, po o fea o filifiliga e mulimuli ai. O le misiona e tatau ona mulimuli i le filifiliga auiliili.

Filifiliga Autu

O se talafaasolopito autu faaletausaga e tatau ona aofia ai mea nei:

Pepa faavaa. O le pepa faavaa e tatau ona avea ma itulau muamua o le talafaasolopito faaletausaga. E mafai ona maua se pepa faavaa masani i le [lds.org/annualhistories](https://www.lds.org/annualhistories) mafai foi ona okaina i le Church Distribution Services. E tatau ona aofia i le pepa faavaa:

- Le igoa ma le numera o le iunite.
- Le tausaga o loo aofia ai.
- Le suafa o le tagata na tuufaatasia le talafaasolopito ma le suafa o le taitai perisitua o le iunite lea na faamaoniaina.

Kalena a le iunite. Ia aofia ai se kopi o le kalena a le iunite o loo faaalua ai mea tetele na tutupu i le aluga o le tausaga.

Fomu e Lagolago Ai Taitai. Ia aofia fomu e Lagolago ai Taitai e faitau i konafesi a uarota ma siteki. E tatau i Misiona ona faaofia mai ai ia fomu e Lagolago ai Taitai e faitau i konafesi a paranesi, i nofoaga ia e le o lavea ai paranesi o se vaega o se siteki po o se itu. O nei fomu o loo lolomiina mai le polokalama komepiuta a le Auaunaga a Tagata ma Taitai (ATT) o loo maua i le tele o iunite o le Ekalesia.

O se faamatalaga puupuu o loo faamatala ai ni mea taua na tutupu ma mea na ausiaina i le tausaga. I le faasologa o mea na tutupu, tusi se aotelega puupuu o mea taua na tutupu ma ausiaina i le tausaga, e pei o le faapaiaina o se fale fou, o le faatuina o se iunite fou, konafesi a le uarota ma le siteki, malaga i malumalu, gaoioiga a le autalavou, galuega fesoasoani, o le masii ese atu o se taitai, po o le tuputupu ae o le uarota. Ia aofia ai le aso, nofoaga, tagata na auai, mea na tutupu, ma le aafiaga o le mea na tupu po o mea na ausia.

E faamalosia ia atapue. Ia manino le faailogaina ma ia i ai le aso, nofoaga, ma se faamatalaga puupuu o le tulaga sa tupu. Afai e mafai, tau mai igoa o tagata uma o i le ata.

Afai e mafai, ia tapa se fomu ua sainia o le Faatagaga e Faaoga ai Ata mo ata uma po o ata vitio o loo aofia i le talafaasolopito faaletausaga. E tatau i le tagata e nafa ma le tuufaatasia o talafaasolopito o iunite taitasi ona faamautinoa ua i ai se fomu ua uma ona sainia mai tagata pueata uma o loo saofaga mai ma ua tuuina i le pito i tua o le talafaasolopito faaletausaga. ([E mafai ona maua le fomu i le vaega o "Punaoa" e amata i le itulau e 9 po o le lds.org/annualhistories.](https://www.lds.org/annualhistories))

Filifiliga Auiliili

E faapoopo atu i anotusi o loo manaomia mo se talafaasolopito autu faaletausaga, o le talafaasolopito auiliili e aofia ai mea nei:

Lipoti faaleperisitua, ausilali, ma tagata o le ekalesia. O le talafaasolopito faaletausaga e maua ai e taitai se avanoa e toe mafaufau ai i a latou tau-mafaiga e fesoasoani i tagata taitoatasi ma aiga ina ia agavaa mo le faaeaga. O nei lipoti o ni vaega taua o le talafaasolopito a le iunite. Ina ia faafaigofie le aoina mai o leni faamatalaga, e ono atiae e le taitai



Valaaulia ia tagata o le aufono a le uarota ina ia saofaga mai i le talafaasolopito faaletausaga.

o le iunite se seti faigofie o fesili mo taitai perisitua ma ausilali e taliina. O fesili e ono atagia ai se faamamafa faapitoa po o sini a le iunite. O le mamanu o le Lipoti Faaleperisitua ma Ausilali e mafai ona faaogaina o se isi lipoti faaleoleo i le atiaeina o se seti tulaga ese o fesili. ([E mafai ona maua le mamanu i le vaega o "Punaoa" e amata i le itulau e 9 po o le lds.org/annualhistories.](#)) Ia tufatufa atu fesili i le amataga o le tausaga e tuu atu ai i tagata le taimi e saunia ai a latou tali. O tali o nei fesili e iloa ai le saofaga atu o korama ma ausilali i le talafaasolopito faaletausaga.

O le talafaasolopito faaletausaga e mafai foi ona aofia ai ni tala patino taua a tagata mai au paia o na iloaina le aao o le Atua i o latou olaga. O tala e uiga i le tulaga o le olaga, faatuatua, ma galuega a le au paia (tagai MF&F 85:1–2) e mafai ona pueina e faaoga ai le mamanu Faamaumauga o Aafiaga Faaleagaga Faaletagata Lava Ia ma Faaleaiga, pe mafai foi ona tusiaina o se tala faamatala faigofie. ([E mafai ona maua le mamanu i le vaega o "Punaoa" e amata i le itulau e 9 po o le lds.org/annualhistories.](#)) Ia mautinoa e faaofia ai aafiaga a tamaitai ma le autalavou. O tala patino e tatau ona saini ai le tagata na auina maia ma ia iloilo ma le faaeteete e le tagata o tuufaatasia le talafaasolopito faaletausaga, le moni ma le talafeagai.



la aofia ai ni atapue e faaleleia ai ia lipoti tusitusia.

Faamatalaga faaopopo mo misiona:

- Valaaulia le peresitene o le misiona e faamau-mau ona mafauaoga o le tausaga ua tea. Ia aofia ai faamatalaga e uiga i luitau, o tulaga manuia, ma le atinaega o le galuega faafai-feautalai i eria eseese o le misiona.
- [Fai i faifeautalai ma isi tagata e faaoga le mamanu o le Faamaumauga o Aafiaga Faaleagaga Faaletagata Lava Ia ma Faaleaiga e faasoa mai ai ni tala patino faaletagata lava ia i le auala na faamanuia ai e le Atua o latou olaga, e pei ona faamatalaina i luga.](#)
- [Valaaulia taitai o paranesi o loo lipoti atu i le misiona e tali mai i seti o fesili ua saunia e le peresitene o le misiona, pe tuu foi ia i latou e faaoga le mamanu o le Lipoti a le Au Perisitua ma Ausilali.](#)

Faamaumauga taua na fatuina e le iunite pe faatatau i le iunite. Mafaufau ia faaofia ai faamaumauga nei:

- Lipoti e i ai fuainumera autu
- Tusi o talafou
- Polokalama ma lomiga faapitoa
- Ata faasolo ma isi gaosiga faaotiovisio (kopi ua uma ona pueina po o mamanu faaeletonika e le o i ai se puletaofia e pei o le PDF, JP2, J2K, JPG, TIF, WAV, MP3, AVI, or MOV).
- Kopi o otiga o nusipepa (e aofia ai faamatalaga o loo faailoa ai le nusipepa ma le aso na lolomi ma faasalalau ai)

Aitema faaopopo mo talafaasolopito o le misiona:

- O se lisi o igoa o faifeautalai faamisiona o loo auauna atu i le misiona i le faaiuga o le tausaga.
- O se faamaumauga o siitaga a faifeautalai i le aluga o le tausaga.
- Lauga na tuuina atu e le peresitene o le misiona.

Taiala o Mea e Le Faalauaiteleina

Faamatalaga e le faalauaiteleina pe patino. E le tatau ona aofia ai faamatalaga e le faalauaiteleina pe patino i le talafaasolopito faaletausaga. O faaitaiga o nei faamatalaga e aofia ai:

- Lipoti o le ta'uta'u atu o agasala, fono aoai a le Ekalesia, po o mataupu maaleale e le faasoaina atu i faatulagaga faitele a le Ekalesia (e pei o fonotaga faaleautaitai).
- Faamaumauga tautupe o loo faamatala ai tupe maua a le Ekalesia (e aofia ai sefuluai ma isi foai), tupe faaalu, ma paketi.
- Faamatalaga tautupe faaletagata lava ia, e aofia ai se faamatalaga e uiga i fesoasoaniga faaleulefea.
- Faamatalaga maoti faalesoifua maloloina a le tagata lava ia.
- O faamatalaga e faamatuu atu e ono solia ai tulafono talafeagai o faamaumauga e le faalauaiteleina (mo se faaitaiga, saunoaga, numera o telefoni, tuatusi imeli, aso fanau, talaaga o solitulafono, talaaga o feusuaiga, po o talaaga faaleaganuu).
- O faaupuga maoti po o faamatalaga auiliili e faatatau i totonu o le malumalu, sauniga o le malumalu, ofusa, po o isi laei o le malumalu.

Tuusaunoaga mo tagata. I tulaga e matua sea-sea lava ona tupu, atonu e talafeagai ona aofia ai faamatalaga e le faalauaiteleina pe patino e uiga i tagata o le Ekalesia pe a manaomia sea ituaiga faamatalaga i le faamaumauna o se vaega taua o le talafaasolopito o le iunite. Afai e tupu leni tulaga, e tatau ona tuu faamatalaga e le faalauaiteleina pe patino i se vaega e ese mai ai ma faailogaina ma le manino "E Le Faalauaiteleina."

Faatagaga e faaoga ia faamatalaga e iloa ai tagata le lolotu. O tulafono o le le faalauaiteleina o faamatalaga i le tele o atunuu ua faasa ai le faaogaina o faamatalaga e iloa ai tagata taitoatasi (e aofia ai o latou igoa) e aunoa ma le muai tapaina o la latou faatagaga tusitusia. O le mea lea, a o lei faaofia ai se faamatalaga e uiga i soo se tagata le lotu i le talafaasolopito faaletausaga, e manaomia le mauaina o se Fomu ua sainia o le Maliega o Talafaasolopito Faaletausaga. E manaomia leni maliega e faasino atu ai i taitoalua o tagata o le Ekalesia, [o latou] matua, [po o a latou] fanau o e e le auai i le Ekalesia. E manaomia foi e faasino atu ai i tagata

le lolotu faapitoa i le alalafaga ato. ([E mafai ona maua kopi o le Fomu o le Maliega o Talafaasolopito Faaletausaga ma le Anavatau mo Faamatalaga e le Faalauaiteleina a le Ekalesia i le vaega o "Punaoa" e amata i le itulau e 9.](#))

Afai e manao le tagata e nafa ma le tuufaatasia o le talafaasolopito faaletausaga e faailoa atu tagata le lolotu i le talafaasolopito, e tatau ona ia tapa mai na tagata se Fomu o le Maliega o Talafaasolopito Faaletausaga ua uma ona sainia ma tuuina atu ia tofu tagata ma se kopi o le Anavatau mo Faamatalaga e le Faalauaiteleina a le Ekalesia. E tatau ona i ai faatasi ia fomu o le maliega ua uma ona sainia ma le talafaasolopito faaletausaga. ([E mafai ona maua kopi o le Fomu o le Maliega o Talafaasolopito Faaletausaga ma le Anavatau mo Faamatalaga e le Faalauaiteleina a le Ekalesia i le vaega o "Punaoa" e amata i le itulau e 9.](#))

Faatonuga mo le Auina Atu

E mafai ona auina atu ia talafaasolopito faaletausaga a le o se kopi faaeletonika po o se kopi ua lolomiina, ae le mafai ona auina atu uma.

- E faagata le auina atu o talafaasolopito a uarota ma paranesi i le siteki i le aso 1 o Mati.
- E faagata le auina atu o talafaasolopito a siteki, itu, ma misiona i le ofisa o le pulega ua atofaina po o le Matagaluega o Talafaasolopito a le Ekalesia i le aso 31 o Mati.



O faasinoala o loo i ai ia ituaiga faamatalaga e pei o tuatusi ma numera o telefoni a tagata e le tatau ona aofia ai i talafaasolopito faaletausaga.



E iloiloina le talafaasolopito faaletausaga e le taitai perisitua a le iunite mo le faamaoniga a o lei auina mai.

E mafai ona fetuunai e Perisitene o Eria ia aso nei ina ia talafeagai ma manaoga o o latou eria. O le a taliaina talafaasolopito e tuai ona auina mai; peitai, ona o le tuufaatasiga o le talafaasolopito faaletausaga e faataunuaina i le tausaga atoa, e sili ai lava ona faaiuina se talafaasolopito faaletausaga mo se tausaga ua tuanai i se taimi vave lava e mafai ai ina ia mafai ona taulai atu i le tausaga o i ai nei. E mafai ona mauaina se kopi o le talafaasolopito faaletausaga i le lotoifale, ae e le mafai ona tufatufaina atu faalauaitele ia kopi.

Pe a auina mai ia talafaasolopito faaletausaga, aua nei faapipiina faatasi ia itulau pe faaoga ni faila mama po o ni pepa kilia e ufi ai. E le tatau ona auina mai ni mea taulima, ipu, ma nisi mea faitino e ave ma vaega o le talafaasolopito faaletausaga.

Auina Mai Faale-Eletonika

E mafai ona auina mai e siteki, itu, ma misiona a latou talafaasolopito faaletausaga faaeletonika pe afai e ausia e talafaasolopito o auina mai ia tulaga nei:

- O loo i ai le talafaasolopito atoa faaletausaga i totonu o se faila PDF e tasi po o le Word file. E tatau ona tuu i totonu o le faila ia ata po o isi mea o loo faapipiina mai. (Aua nei imeli maia ia faila faalogologo po o vitio.)Fai se igoa o le faila e faaoga ai le igoa ma le numera o lou iunite. Mo se faataitaiga, Syracuse Utah South 521477.pdf.
- E le silia ma le 12 mekapaita [megabytes] le faila. E taliaina se faila ua uma ona faalaitiiti.

O talafaasolopito faaletausaga e le ausiaina nei tuutuuga e tatau ona auina mai i se kopi ua uma ona lolomiina.

Auina atu le faila faaeletonika i le: annualhistory@ldschurch.org

Ia aofia ai le faamatalaga lenei i le tino o le imeli:

- O le igoa ma le numera o le iunite
- O le tausaga o loo aofia ai

Auina Mai o Kopi Ua Uma ona Lolomiina

E tatau i iunite i le Iunaite Setete ma Kanata ona lafo mai le lomiga autu o le talafaasolopito faaletausaga i le:

Matagaluega o Talafaasolopito a le Ekalesia
Talafaasolopito Faaletausaga
15 East North Temple Street
Salt Lake City, UT 84150-1600

O iunite i fafo atu o le Iunaite Setete ma Kanata e tatau ona lafo mai le lomiga autu o le talafaasolopito faaletausaga i le ofisa o le pulega ua atofaina, lea o le a latou lafoina atu i le Matagaluega o Talafaasolopito a le Ekalesia.

Punaoa

Fuaitau mai le “E! Ia Manatua, Ia Manatua Lava,” saunia e Peresitene Henry B. Eyring
(lauga o le konafesi aoao)

Fuaitau mai le “Ia Manatua Ina Ia E Le Fano,” saunia e Elder Marlin K. Jensen (lauga o le konafesi aoao)
Lipoti a le Au Perisitua ma Ausilali (mamanu)

Faamaumauga o Aafiaga Faaleagaga Faaletagata Lava Ia ma Faaleaiga (mamanu)

Faatagaga e Faaaoga ai Atapue (fomu)

Fomu o le Maliega o Talafaasolopito Faaletausaga

Anavatau mo Faamatalaga e Le Faalauaiteleina a le Ekalesia



Fuaitau mai le “E! Ia Manatua, Ia Manatua Lava”

Saunia e Peresitene Henry B. Eyring, Fesoasoani Muamua i le Au Peresitene Sili

Liahona, Nov. 2007, 66–69



A o laiti lava le ma fanau, sa amata ona ou tusitusia ni nai mea e uiga i mea sa tutupu i aso taitasi. Sei ou faamatalaina atu le auala na amata ai lena mea. Sa ou tuai mai i le fale mai se tofiga faale-Ekalesia. Sa pogisa. Sa faateia au e le tamā o lo’u toalua, o le sa nofo latalata mai

ia i matou, a o ou savali agai atu i le faitotoa i luma o lo’u fale. Sa amo mai lana amoga o paipa, ma savali teleai mai ma ona ofu faigaluega. Na ou iloa sa ia fauina se pamu e pamu mai ai le vai mai se vaitafe na i lalo atu o lo matou fanua.

Sa soiso mai o ia, ma talatalanoa lemu mai, ona toe alamu ane ai lea i ou tafatafa i le pogisa e faaauau lana galuega. Sa ou savali teisi agai atu i le fale, ma mafaufau i lana mea sa fai mo matou, ma i le taimi na ou taunuu ai i le faitotoa, sa ou faalogoina i lou mafaufau—ae le o lou leo—ia upu nei: “Ou te le o tuuina atu nei aafiaga mo oe lava. Tusi i lalo.”

Sa ou alu i totonu. Ou te lei alu ou te moe. E ui lava ina sa ou lē lavā, ae sa ou aumaia ni pepa ma amata loa ona tusi. Ma a o ou faia, sa ou malamalama i le savali sa ou faalogoina i lou mafaufau. Sa tataua ona ou tusia mo lau fanau e faitau ai, i se taimi i le lumanai, le auala na ou vaaia ai le aao o le Atua sa faamanuiaina ai lo matou aiga. Sa le tau faia e tamamatua le mea sa ia faia mo i matou. Semanu e mafai ona ia fai i se tasi na te faia, po o le le faia lava. Ae sa auauna mai o ia ia i matou, o lona aiga, i le ala e masani ona faia ai e soo o le feagaiga a Iesu Keriso. Sa ou iloa e moni lena mea. Ma o lea sa ou tusia ai i lalo, ina ia mafai ai e la’u fanau ona manatua i se aso, i le taimi latou te manaomia ai.

Sa ou tusia ni nai laina i aso taitasi mo le tele o tausaga. Ou te lei misia lava se aso tusa lava po o le a lou lē lavā, po o le a foi le vave ou te usua’i ai i le taeao e sosoo ai. Ae ou te lei tusia se mea, ou te

mafaufau lava i le fesili lena: “Pe na ou vaaia le aao o le Atua e aapa mai e pai mai ia i maua po o le ma fanau po o le matou aiga i le aso.” A o faaauau pea ona ou faia lena mea, sa amata ona tupu se mea. Pe a ou mafaufau i mea na tutupu i le aso, ou te vaaia faamaoniga o mea sa faia e le Atua mo se tasi o i matou ae ou te lei iloaina i taimi pisi o le aso. A o tupu lena mea, ma e tele lava taimi e tupu ai, sa ou iloaina ai o le taumafai e manatua, na mafai ai e le Atua ona faasino mai ia te au le mea sa Ia faia.

E sili atu i le na o le lotofaafetai na tupu ae i lou loto. Sa tupu ae le molimau. Sa amata ona ou mautinoa atili e faafogaina e lo tatou Tama Faalelagi tatalo ma tali mai i ai. Sa tele atu lou lotofaafetai ona o le faamaluluina ma le faaleleia e oo mai ona o le Togiola a le Faaola o Iesu Keriso. Ma sa atili ai ona ou mautinoa e mafai e le Agaga Paia ona faamanatu maia mea uma ia i tatou—e oo lava i mea tatou te lei matauina pe gauai atu i ai pe a tutupu.

Ua mou atu tausaga. Ua matutua uma lau fanau tama. Ma o lena o nisi taimi e faafofo ai a’u e se tasi o i latou, “Tama, sa ou faitauina lau kopi o le tusi o talaaga e uiga i le . . .” ona ia faamatala mai lea e uiga i le faitauina o le mea sa tupu i se taimi ua leva ua fesoasoani ia te ia na te iloa ai se mea sa faia e le Atua i lona aso.

O la’u mau, o le uunaia lea o outou e saili auala e faailoa ai ma manatua le agalelei o le Atua. O le a fausia ai a tatou molimau. Atonu e le o tusia sau tusi o talaaga. Atonu e te le o faasoaina atu sau faamaumauga o tausi ia i latou e te alofa i ai ma tautuaina. Peitai, o le a faamanuiaina oe ma i latou pe a e manatuaina mea sa faia e le Alii. . . .

O le po nei, ma le po a taeao, atonu o le a e tatalo ma mafaufau, ma fesili: Pe na auina mai e le Atua se savali na patino mo au? Pe sa ou vaaia Lona aao i lou olaga po o olaga o lau fanau? O le a ou faia lena mea. Ona ou sailia ai lea o se ala e teu ai lena manatuga mo le aso o le a ou manatua ai, ma manatua ai e i latou ou te alofa i ai, le tele o le alofa o le Atua ia i matou ma le tele matou te manaomia ai o Ia. Ou te molimau atu e alofa o Ia ia te i tatou ma faamanuia ia i tatou, e sili atu nai lo le mea ua tatou iloa. Ou te iloa e moni lena mea, ma e aumaia ai le olioli ia te au i le manatuaina o Ia.

Fuaitau mai le “Ia Manatua Ina Ia E Le Fano”

Saunia e Elder Marlin K. Jensen o le Fitugafulu (Tusitalafaasolopito ma le Tusitalafaamaumau a le Ekalesia)

Liahona, Me 2007, 36–38



Afai tatou te silasila totoa i aogā o le upu *manatua* i totonu o tusitusiga paia, o le a tatou iloaina ai o le manatuaina i le auala ua fuafuaina e le Atua, o se mataupu faavae autu ma le faaola o le talalelei. E mafua lenei mea ona o loo faamanatu mai pea e le aunoa i apoapoaiga faape-

rofeta ina ia manatua e faatino: ia faalogo, ia vaai, ia fai, ia usitai, ia salamo [tagai i le 2 Nifae 1:12; Mosaea 6:3; Helamana 5:14. Afai tatou te manatuaina i le auala a le Atua, tatou te faatoilaloina lo tatou lagona faaletagata soifua e na ona saunia mo le taua o le olaga ae tau ai i le taua lava ia, i le faia o mea uma i lo tatou malosi e tetee atu ai i faaososoga ma aloese ai mai le faia o le agasala.

Na talosagaina e le Tupu o Peniamina lea ituaiga o manatuaga ola mai lona nuu:

“Ma mulimuli lava, e le mafai ona ou ta’u atu ia te outou mea uma e mafai ona outou faia ai le agasala; ona ua tele ala ma auala eseese ua matua tele e le mafai ona ou faitauina.

“Ae o le mea lenei e mafai ona ou ta’u atu ia te outou, afai tou te le vaavaaia outou lava, ma o outou mafaufauga, ma a outou upu, ma a outou galuega ma tausi i poloaiga a le Atua, ma tumau pea i le faatuatua i mea ua outou faalogo i ai e uiga i le afio mai o lo tatou Alii, e oo lava i le iuga o o outou ola, e fano lava outou. Ma o lenei le tagata e, ia manatua, ma lē fano ai.” [Mosaea 4:29–30].

I le iloaina o le matafaioi taua o le manatua e faia i o tatou olaga, o a la isi mea e ao ona tatou manatuaina? . . . Ou te fautua atu e ao ona tatou manatuaina le talafaasolopito o le Ekalesia a Iesu Keriso ma ona tagata. Ua tuuina atu e tusitusiga paia le faamuamua maualuga i le talafaasolopito o le

Ekalesia. O le mea moni lava, o le tele o tusitusiga paia o le talafaasolopito lea o le Ekalesia. I le aso tonu lava na faavaeina ai le Ekalesia, na poloaiina ai Iosefa Samita e le Atua, “Faauta, o le a i ai se tala tusia faamauina e tausia e outou” [MF&F 21:1]. Na galue Iosefa e tusa ai ma lenei poloaiga e ala lea i le tofiaina o Oliva Kaotui, le toeaina lona lua i le Ekalesia ma o lona fesoasoani sili, e avea ma uluai tausi talafaasolopito o le Ekalesia. Tatou te tausia faamaumauga ina ia fesoasoani ia i tatou e manatua, ma o se faamaumauga o le amataga ma le alualu i luma o le Ekalesia sa tausia lava mai le taimi o Oliva Kaotui e oo mai i le taimi nei. O lenei talafaasolopito ofoofogia e faamanatu mai ai ia i tatou na toe tatalaina e le Atua le lagi ma faaali mai upumoni lea ua valaauina ai lo tatou tupulaga ina ia faatinoina. . . .

. . . O le manatuaina e mafai ai ona tatou vaai le aao o le Atua i o tatou aso ua tuanai, e pei lava ona valoiaina ma le faatuatua e faamautinoa mai ai ia i tatou le aao o le Atua i lo tatou lumanai. . . .

. . . E masani ona tatou talanoa i le manatuaina o a tatou feagaiga paia ma poloaiga a le Atua, ma le manatuaina ma le faatinoina o sauniga faaola mo o tatou tuua ua maliliu. O le mea e sili ona taua, tatou te talanoa e uiga i le manaomia ona manatua lo tatou Faaola o Iesu Keriso ae le seiloga o taimi tala-feagai, ae o taimi uma, e pei ona Ia fetalai mai [tagai i le 3 Nifae 18:7, 11]. Tatou te molimau atu ina ia manatua pea o ia pe a tatou taumamafa i le faamanatuga. Afai e faapea, ua folafola mai o le a faatasi pea Lona Agaga ma i tatou. O le mea e maofa ai, o le Agaga lava lenei e tasi na auina mai e lo tatou Tama Faalelagi ina ia “faamanatu mai foi o ia ia te i tatou i mea uma” [Ioane 14:26]. O lea, o le taliaina ma le agavaa o le faamanatuga, e faamanuiaina ai i tatou e le Agaga ina ia ulu atu i se siosiomaga matagofie ma le faamanuiaina o le manatuaina, e toe foi mai pea lava pea i o tatou mafaufau ma tuuto atu ia Keriso ma Lana Togiola.

O le o mai ia Keriso ma faaatoatoaina ia te Ia, ou te talitonu, o le faamoemoega autu lava lea o mea uma e manatuaina [tagai i le Moronae 10:32–33]. O lea, ou te tatalo ai ina ia faamanuia i tatou e le Atua ina ia manatua pea, aemaise lava Lona Alo atoatoa, ma ia lē fano lava.

Lipoti a le Au Perisitua ma Ausilali

O loo i lalo ni fesili fautuaina e fesoasoani ai i taitai perisitua ma ausilali ia saofagā i le talafaasolopito faaletausaga. (O lenei mamanu ua fuafuaina e avea o se taiala ma e le manaomia ona matuai mulimuli-taia atoa.) O faamatalaga auiliili, e aofia ai atapue, o le a faateleina ai le tulaga taua o le talafaasolopito.

Faaaoga ni itulau faaopoopo mo tali pe a manaomia.

Faamatala mai ni taumafaiga e fesoasoani ai i tagata o le au paia ina ia ola ai i le talalelei a Iesu Keriso.

Faamatala mai ni galuega faafaifeautalai i lau uarota po o le paranesi.

Faamatala mai ni taumafaiga o le tausiga o e matitiva ma e le tagolima (aua nei faaogaina ni igoa e aunoa ma se faatagaga).

Faamatala mai ni taumafaiga e fesoasoani atu ai i tagata o le au paia e toe saili o latou talafaasolopito faaleaiga ma faatino ia sauniga o le malumalu.

I le avea ai ma se taitai, faamatala mai pe na faapefea ona e lagonaina musumusuga a le Alii ma lagona-ina le aao o le Atua o taialina au taumafaiga.

Faamatala mai nisi faamatalaga faaopoopo e te lagona e taua ona faaafia ai i lenei lipoti.

Faamaumauina o Aafiaga Faaleagaga Faaletagata Lava Ia ma Faaleaiga

Ua faamalosiā mai Peresitene Henry B. Eyring i tagata o le Ekalesia “e saili auala e faailoa ai ma manatua le agalelei o le Atua. O le a fausia ai a tatou molimau. . . . le a faamanuiaina oe ma i latou [tagata o lou aiga] a o e manatuaina mea sa faia e le Alii” (E! Ia Manatua, Ia Manatua Lava,” *Liahona*, Nov. 2007, 66).

1. Oototoga

Aso

O anafea na tupu ai le aafiaga? (Faamaumau le tau-saga, vaiāu, aso, taimi.)

Tagata

Lisi ia tagata o loo aafia i lenei aafiaga.

Nofoaga

O fea na tupu ai? (Lisi le nofoaga o lenei aafiaga.)

Tulaga

O le a sau mea na faia i le taimi lena? (Lisi ia faama-talaga auiliili faasolopito ma patino.)

Poto

O le a se mea na e aoaoina mai lenei aafiaga (i se fuaiupu e tasi)?

2. Faamatala

Ia, tusi le tala atoa e faaāoga ai elemene o loo faamaumauina i le oototoga. (O lenei mamānu ua fuafuaina e avea o se taiala ma e le manaomia ona matuai mulimulitaia atoa.) **Faaāoga ni itulau faa-opoopo mo tali pe afai e manaomia.)**

3. Saini

Saini lau talafaasolopito e faamaonia ai o lau tala lenei ma e moni.

Faatagaga e Faaoga ai Atapue

Mo atapue uma po o gaosiga o otiovisio ua auina mai e faaafia i totonu o se talafaasolopito faaletausaga, e faatumu e le tagata e ana ia atapue po o gaosiga o otiovisio ia le fomu lenei ma tuu atu i le tagata ua tofia e tuufaatasia le talafaasolopito.

Tuutuuga, Aiaiga, ma le Maliega a Lē Ana

O au, o lē o loo saina i lalo, o lē na fatuina ma le pule (o “Lē Ana”) ia atapue ma gaosiga o otiovisio ua faailoa atu i le “Lisi o Atapue ua Auina Atu” i lalo o le vaega (o “Atapue”).

Ua ou tuuina atu i le Corporation of the President of The Church of Jesus Christ of Latter-day Saints ma ona itutino fesootai (tuufaatasia i le, “COP”) se laisene ma se faatagaga tumau e leai se tofogi, i le lalolagi atoa, e le faatapulaaina, e le faapitoaugafa, e le faamutaina i se taimi, e faaoga ai ma le saoloto ia Atapue, e aofia ai le aia tatau e toe gaosia ai, tufatufa atu, nono atu, tuuina atu, faatino, faaali, faasalalau, fesootai atu i tagata lautele, fesua’i, oti, faasa’o, faaleleia, fetuunai, saunia mo le toe kopiina, ma le isi itu pe faaoga atoa ia Atapue pe na o se vaega, i soo se ala po o ala uma o faasalalau, i se aofaiga e le faatapulaaina, ma i soo se ala po o ala uma ua iloaia i le taimi nei pe mulimuli ane fuafuaina, faatasi ai ma le aia tatau e toe tuu atu ai ma le saoloto le laisene i isi e faia ai soo se mea po o mea uma e pei ona ta’ua i luga.

I le tulaga atoa ua faatagaina e le tulafono, ou te tuu atu ai, e faavavau ma i le atulaulau atoa, soo se [aia] ma “aia tatau faamaoni” uma ua ta’ua i le taimi nei pe aloaia mulimuli ane e tusa ai ma Atapue ma i vaega taitasi ma vaega uma o i ai mo soo se faaogaaga ma faaogaaga uma ua silafia i le taimi nei pe o le a mulimuli mai, ala o faasalalau, ma/po o fomu. I lenei tulaga, ou te faailoa atu ai ma ua ou malie ai o le a ou le taliaina se tau i le faaogaina pe i le fesootaiga ma le faaogaina e le COP o Atapue.

Ua fai au ma sui e faamaonia ai o nei Atapue o ni ata na muai pueina lava ma e le i kopiina pe na maua mai i se isi punavai ma e ia te au le aia tatau atoa ma e le faatapulaaina e tuuina atu ai lenei faatagaga e faaoga ai ia Atapue. I lo’u lava iloa ma le talitonuga sili, o le faaogaina ai e le COP o Atapue e tusa ai ma lenei faatagaga o le a le solia ai le puletaofia po o nisi aia tatau a soo se tagata po o se itutino.

E avea a’u ma sui e faamaoniaina ua uma ona ou faitau i lenei Faatagaga e Faaoga ai Atapue ma e ala i le saina o i lalo ua ou tuuina atu ai le faatagaga ua uma ona faatulagaina i i.

| | |
|---|---------|
| Igoa o Lē Ana (faamolemole tusi lolomi) | Tuatusi |
| Saini | |
| Aso | |

Faatagaga a Matua Afai o Lē Ana ia Ata o se tamaitiiti laitiiti, e tatau ona faatumu mea nei e matua po o tagata o loo vaaia Lē Ana.

O a’u, lē o loo saina, ou te faamaonia ma avea ma sui o se tasi o matua po o le e vaavaaia le tamaitiiti laitiiti, o Lē Ana [meatotino] o i luga, ua ia te a’u le pule atoa e faamatuu atu ai le Faatagaga e Faaoga ai Atapue e fai ma sui o Lē Ana, ma e ala i le saina o i lalo ua ou tuuina atu ai lenei faatagaga e fai ai ma sui o Lē Ana.

| | |
|--|---------|
| Igoa o matua po o le o loo vaaia (faamolemole tusi lolomi) | Tuatusi |
| Saini | |
| Aso | |

Lisi o Atapue ua Tuuina Atu Faaauu i le itulau 2. Afai e manaomia nisi avanoa, faaoga se isi fomu, ua uma ona saina.

O le lisi lea o atapue ma gaosiga o otiovisio ua ou tuuina atu.

| Faamatalaga puupuu | Aso | Nofoga | Igoa o i latou o loo i ai i le atapue po o le gaosiga |
|--------------------|-----|--------|---|
| | | | |
| | | | |
| | | | |
| | | | |

E ui lava e le o au o se tagata o Le Ekalesia a Iesu Keriso o le Au Paia o Aso e Gata Ai (“o le Ekalesia”), ae ua ou tuuina atu le pule i le Ekalesia ma ona itutino fesootai e aoina ai, faatino, faaaoga, ma fesiitai ai i isi atunuu ma/po o itutino talafeagai o’u faamatalaga patino ma/po o atapue e pei ona faaaogaina i le mamauina o se talafaasolopito a le Ekalesia i le lotoifale (“Talafaasolopito”). Ou te iloa o le a faaaogaina o’u faamatalaga patino e tusa ai ma le Anavatau Patino mo Faamatalaga a le Ekalesia, lea na ou mauaina le avanoa e iloiloina.

Ua ou tuuina atu foi le pule i le Ekalesia ma ona itutino fesootai e faaalai ai pe faaavanoaina ia ituaiga faamatalaga patino ma/po o atapue e avea ma se vaega o taumafaiga a le Ekalesia e lolomiina pe faaavanoaina le Talafaasolopito i soo se auala e fuafuaina e le Ekalesia ma ona itutino fesootai.

| | | |
|---|-------|-----|
| Igoa o le tagata o loo auina mai ia faamatalaga (faamolemole tusi lolomi) | Saini | Aso |
|---|-------|-----|

O Le Ekalesia a Iesu Keriso o le Au Paia o Aso e Gata Ai, ina ua i ai se tuatusi i le 50 East North Temple Street, Salt Lake City, Utah 84150, ma ona itutino e aofia ai (e ta'uaofai "o le Ekalesia") ua faaaogaina le Anavatau Patino mo Faamatalaga lea * e faailoa atu ai i tagata taitoatasi e uiga i gaioiiga a le Ekalesia e faatatau i le aoina, tausiga, faaaogaina, ma le fesiitaiga (e ta'uaofai o le "faagasologa") o faamatalaga e patino i le tagata.

1. E faagasolo e le Ekalesia ia faamatalaga patino lautele ma maaleale e uiga i tagata o le Ekalesia. O faamatalaga patino e masani ona ao sa'o mai tagata o le Ekalesia (po o ona matua, pe afai e laitiiti). E mafai foi ona ao mai faamatalaga patino mai taitai faalelotu po o isi punavai aloaia.
2. E faagasolo le faiga o faamatalaga patino e: (a) amatalia ai ma tausisia pepa faamaumau i le Ekalesia, foai, talafaasolopito, ma gafa; (e) iloilo ai le agavaa e auai i le faatinoga o sauniga i le malumalu ma isi, galuega faafaifeautalai, ma tulaga faavolenitia ma faaletaitaiga; ma (i) faafoe ai le polokalama o aoaoga faalelotu a le Ekalesia.
3. O le tuuina mai o faamatalaga patino i le tagata e le faamalosia. A oo ina tuuina mai ni faamatalaga patino e uiga i se tasi nai lo le tagata lava ia, o le a maua e le tagata o le Ekalesia le maliega a le isi tagata ma tuuina atu le faatagaga i lenei tagata mo lenei Anavatau Patino mo Faamatalaga. E le faatatau lenei tulaga manaomia i le mea lea e aumaia ai e matua faamatalaga patino i le Ekalesia, mo a latou fanau laiti.
4. Ina ia puipuia le lē faalauaiteleina o faamatalaga patino ua faagasolo, e faaaoga e le Ekalesia ia fuataga faapitoa ma faale-faalapotopotoga talafeagai e tusa ma le maaleale o

le faamatalaga. O le faaaogaina o faamatalaga patino e le faalauaiteleina ma maaleale, ua na o taitai ma tagata ua faatagaina aloaia o le Ekalesia. A mafai ona faatagaina i le tulafono i le lotoifale, e i ai faamatalaga lautele ma patino (igoa, tuatusi, numera o telefoni, ma tuatusi i-meli) e mafai ona tuuina atu i tagata o le Ekalesia i totonu o le uarota/paranesi/itu lava lenei e tasi.

5. E mafai ona fesiita'i faamatalaga patino i isi itutino o le Ekalesia i lenei atunuu ma isi atunuu e faalētele ni tulafono malolosi o i ai mo le puipuiga o faamatalaga.
6. I le i ai o se talosaga tusitusia ma pe afai e manaomia ai i le tulafono i le lotoifale, e mafai ai e tagata taitoatasi ona faatagaina le faaaogaina o a latou faamatalaga patino, e faama'oti mai ai ina ia faasa'o pe toe faafou o latou faamatalaga patino, pe tetee foi i le faagasologa o o latou faamatalaga patino. E mafai e failautusi o uarota ma paranesi ona tuuina atu faamatalaga lautele ma patino i tagata o le au paia ma e mafai ona fautuaina tagata po o fea e auina i ai talosaga tusitusia e maua ai isi faamatalaga patino.
7. E pau lava le mea e tausisia ai e le Ekalesia ia faamatalaga patino pe a tatau ai mo faamoemoega o loo ootoo atu i lenei anavatau. O nisi faamatalaga e le iloa le umi e tausisia ai o se vaega o faamaumauga tumau o gafa, pepa faamaumau, talafaasolopito ma isi.

O fesili e faatatau i lenei Anavatau Patino mo Faamatalaga po o le malupuipuia o faamatalaga patino e faagasolo e le Ekalesia, e tatau ona auina mai i se i-meli i le DataPrivacyOfficer@ldschurch.org.

Faataitaiga—Aua Nei Faaalia

O LE EKALESIA A
IESU KERISO
O LE AU PAIA O ASO
E GATA AI

